è mal contento; à letere dil signor Constantin, qual ha, da quel orator yspano è de lì, che 'l dito re suo à promesso a Franza le X galie per Zenoa, e dar la sua armata a l'imperador per il colfo nostro. Item, scrive esso orator nostro, solicita col papa quanto el pol l'impresa di Ferara. Eri sera fo, poi cena, tre horre, sollo con soa santità, in diverssi ragionamenti. Il papa concluse, omnino voler Ferara, e cussì l'orator lo persuase. Va a Bologna, ma prima a Loreto, per compir il voto di Nostra Dona, poi in 8 zorni sarà a Bologna; desidera, il marchese sia fuora a nome di la Signoria nostra. Il papa à conduto Mutio Colona; dil resto di le zente di fiorentini non si potrà servir, come il crede. Di le trieve con l'imperador e la Signoria nostra non li par al preposito; et voria scomunichar il re di Franza. L'orator nostro aspeta risposta nostra di quello l'habbi a far, perchè in concistorio li cardinali a tal excomunication sarano li voti molto contrarij; tamen il roy à suspeso l'intrade, tutti i beneficij, et ordinato parlamento de episcopi in Franza. Il papa vol far una bolla, tutti li episcopi vengino a Roma, aliter siano privi di soi beneficij; et à mandato, per il datario, a tuor a Roma ducati 60 milia, mo terzo zorno i zonseno. Item, le lanze 300 yspane vien lentamente, come feva le 400 prime. Il papa dice: Questo re è uno tachagno; non vol soa santità ultimi l'impresa di Zenoa. Item, il signor Fedrigo, fiol primogenito dil marchexe di Mantoa, è zonto a Roma, a Belveder; il papa li à deputà certa custodia e compagnia. Desidera, il marchese sia conzo con la Signoria nostra; e volse che lui orator l'altro zorno li scrivesse una letera, et ozi n' à scrito una altra al dito marchexe, et manda la copia di la dita letera. Item scrive, il conte Filippo di Rossi è zonto lì a Fuligno, et manda una letera al vescovo, suo fratello. Item, esso orator scrive de' biscoti per l'armada; e manda letere dil provedador.

Di sier Hironimo Contarini, provedador di l' armada, date in galia, a presso Piombim, a dì 27 avosto. Come si levò con 8 galie di Civita Vechia, et 6 rimaseno a levar li fanti, fonno numero 270 e non più, e con esso provedador vene le tre barze e la galeaza, e zonse a Porto Hercule, poi ozi lì a presso Piombim. Ad horre 16 etiam sono zonte le altre 6 galie, con li fanti. Zenoesi, over il re di Franza, hanno tre nave grosse, galioni XX, galie 6 di Prejam. Et ha terminà esso provedador, col comissario dil papa, lassar le tre barze e galeaza lì a Piombin, et con le galie andar versso Zenoa la notte; 142 tamen tien l' impresa sarà dificile, si sguizari non

vengano zoso. Tamen lui atenderà a far ogni cossa, per l'impresa et la segurtà di l'armata, come è di mente di la Signoria nostra. Item, ha electo soracomito di la galia fo Polana sier Hironimo Corner, di sier Zorzi, cavalier, procurator; prega sia confirmato con titolo di soracomito. Item, scrive zercha il bisogno di l'armada de biscoti; et ne ha solum per zorni 6.

Di Padua, di rectori, date eri. Zercha quelli fanti et contestabeli sono de li, zoè Maldonato, spagnol, in Coa Longa con fanti 160, Zuan Maraja.......... con 120, Anzolo di Rechanati in la Sarasinescha con 70, et in castello Nicolò da Cataro con 24. Item, scriveno si lavora il fosso di Coa Longa, e altre fabriche, ordinato per lo illustrissimo governador e provedadori zenerali. Item scrive, de vituarie in campo non bisogna tanto. Item, è zonto in questa sera Folegino lì, con 6 altri, vien di Mantoa, e vien a Venetia.

Di sier Alvixe Loredam, quondam sier Luca, provedador sora i turchi, date in campo, a San Martim, a dì 3. Come in quel zorno il governador e provedadori sono andati a Montorio, con 30 in 40 cavali de' turchi, col vayvoda Vanis; etiam lui provedador vi andoe. Et andato sopra uno monte, vete ussir di Verona cavali 800. Et venendo 250 di dito numero in qua, quelli turchi li fonno contra vigorosamente; do de li qual fonno feriti da ditti inimici, uno di 4, l' altro di 2 ferite, e il terzo ave tre lanzade, et non ave mal alcuno. Questi sono homeni da esser extimati, et li lauda assai. Item, il capitanio di le fantarie vol tuor lui i spagnoli, sono in Verona, per li fanti el dia far etc.

Di domino Antonio di Pij, condutier nostro, date in campo, a San Martim, a dì . . . . Dimanda licentia da la Signoria, non vol più il soldo. Scrive, domenega à persso una bella vitoria; vol venir a Veniexia. Dice, Dio volesse fosse stà aldito. Carga tacite il capo etc.

Dil colateral zeneral, date in campo, a San Martim dil Bon Albergo. Scrive, come à sparagnà a la paga di ducati 6000, perchè l'altra montò ducati 53 milia, et questa ducati 47 milia; e questo, perchè si pagava zente inferma et morta, et con 4 marzelli uno feva la mostra etc.

Di Cividal di Friul, di sier Andrea Contarini, provedador, di 3. Dimanda licentia, è amalato. Item, a Goricia, Tulmin e in Lubiana è il morbo; e ad ogni modo il suo star li non è bisogno. Et cussì per colegio li fo dà licentia el venisse via.

Da Cataro, di sier Pollo Valaresso, retor e